

Ն. Գ. ԱՎԱԳՅԱՆ

ԿԵՆՍԱՐԱՆԱԿԱՆԻ ԵՎ ՍՈՑԻԱԼԱԿԱՆԻ ՄԻԱՍՆՈՒԹՅՈՒՆԸ

Կենսաբանականի և սոցիալականի փոխհարաբերության դիալեկտիկա-մատերիալիստական ըմբռնման հիմնական սկզբունքները մշակվել են մարքսիզմի կլասիկների, մասնավորապես Ֆ. էնգելսի կողմից՝ անտրոպոգենեզի աշխատանքային տեսության և մատերիայի շարժման ձևերի փոխհարաբերության մասին նրա ուսմունքում: Այդ ուսմունքը ելնում է մարդու մեջ կենսաբանականի և սոցիալականի անխզելի միասնությունից: Համընդհանուր նախադրում է գտել այն կարծիքը, որ մարդկային անհատը կարող է դիտվել ժառանգականության (կենսագործոն) և շրջապատող միջավայրի (աբիոտիկ, բիոտիկ և սոցիալական) արդյունք: Այլ կերպ ասած, մարդը բնության և հասարակության արդյունք է, քանի որ հասարակությունն ինքը բնության հետ մարդու ավարտուն էական միասնությունն է. (Կ. Մարքս): Ինչպես նշել է Ֆ. էնգելսը, բնությունն ու պատմությունը երկու հիմնական տարրեր են այն միջավայրի, որում ընթանում է մեր կյանքը, աշխատանքը և հանգիստը:

Մարդը, որպես առանձին անհատ, որպես անձ, իրենից ներկայացնելով որոշակի կենսաբանական համակարգ, սոցիալական որոշակի համակարգի տարրն է հանդիսանում: Մարդու բնության այդ երկակիությունն արտահայտելու համար գրականության մեջ, սովորաբար, օգտագործվում են երկու հասկացություններ՝ «օրգանիզմ» և «անհատ», որոնցից առաջինն արտացոլում է մարդու կենսաբանական բնույթը, իսկ երկրորդը՝ այն փաստը, որ առանձին մարդը հանդիսանում է այս կամ այն սոցիալական համակարգի (հասարակության) տարր, սոցիալական որոշակի ֆունկցիաների և հարաբերությունների կրողը:

Մարդու մեջ կենսաբանականը այն է, ինչ վերաբերում է նրա կենսագործունեությանը, ինչ նա ժառանգել է իր կենդանի նախորդներից և կապում է նրանց հետ: Կենսաբանականին են վերաբերում մարդու բջիջներում, հյուսվածքներում, օրգաններում և ամբողջությամբ վերցրած օրգանիզմում տեղի ունեցող կենսապրոցեսները, նրանց ձևը, կառուցվածքը և ֆունկցիան, կազմավորման ու զարգացման օրինաչափությունները: Մարդու կենսաբանական ոլորտին են պատկանում նաև ժառանգականության, փոփոխականության և սաղմնային զարգացման օրինաչափությունները, բջջային, ենթաբջջային և մոլեկուլյար մակարդակներում տեղի ունեցող պրոցեսները:

Սոցիալականը մալուղու մեջ այն է, ինչ կապված է նրա գիտակցության, առհասարակ նրա հոգեկան ֆունկցիայի հետ: Սոցիալականը, սակայն, նույնական, հավասար չէ հոգեկանին. նրանց նույնությունը սահմանափակված է կոնկրետ անհատի շրջանակներով: Կոնկրետ անհատից, նրա օրգանիզմից դուրս սոցիալականը միջմարդկային նյութական և հոգևոր հարաբերությունների ամբողջությունն է, հարաբերություններ, որոնք արտացոլվում են մարդու գիտակցության մեջ հասկացությունների ձևով: Մարդու կենսաբանական առանձնահատկությունը կենդանիների համեմատությամբ կայանում է նրանում,

որ նա կարող է կրել սոցիալական ֆունկցիա՝ մի կողմից գիտակցության ձե-
վով արտացոլել միջմարդկային սոցիալական զարգացման օրինաչափություն-
ները, մյուս կողմից՝ մարդու աշխատանքային (ֆիզիկական և մտավոր) գոր-
ծունեության կենսաբանական նախադրյալ և հիմք հանդիսանալ:

Այսպիսով, կենսաբանականն ու սոցիալականը մարդու մեջ հանդես են
դալիս անխզելի միասնությամբ և շնորհիվ այդ միասնության՝ փոխներգոր-
ծում են: Սոցիալականի և կենսաբանականի փոխներգործության էությունը
կայանում է նրանում, որ կենսաբանականը հանդիսանում է հիմք, նախա-
դրյալ և հնարավորություն սոցիալական զարգացման համար, իսկ սոցիա-
լականը, իրականանալով կենսաբանական որոշակի հիմքի վրա, ակտիվորեն
ներգործում է կենսաբանականի վրա, «ծառայեցնելով» նրան յուր պահանջ-
ներին: Այն ամենը, ինչով օժտված է մարդը և ինչով նա տարբերվում է կեն-
դանիններից, արդյունք է նրա հասարակական զարգացման, ընդորում, դա վե-
րաբերում է ոչ միայն նրան, ինչ մարդը ձեռք է բերել անհատական կյանքում,
այլև նրան, ինչով նա ծնվում է: Մանուկը լույս աշխարհ է գալիս արդեն որո-
շակի անատոմա-ֆիզիոլոգիական (ժառանգական) նախադրյալներով, հնարա-
վորություններով, որոնք կուտակվել են նախորդ հազարամյակներում՝ որպես
արդյունք նրա և միջավայրի փոխազդեցության շնորհիվ տեղի ունեցած զար-
գացման: Նորածին մանկան մոտ նրա կենսաբանական կազմությունը հան-
դես է գալիս որպես միայն մարդանալու հնարավորություն, որը իրականու-
թյուն է դառնում, այսինքն մանուկը մարդ է դառնում միայն որոշակի սոցիա-
լական միջավայրում, իրեն նման էակների հետ փոխհարաբերության պայ-
մաններում:

Որ մարդու սոցիալական զարգացման համար անհրաժեշտ են որոշակի
«մարդկային» կենսաբանական նախադրյալներ, այդ մասին վկայում է Ն. Ն.
Լոդիգինա-Կոտսի կողմից Իոնի երիտասարդ շիմպանզեին «դաստիարակելու»
փորձը. Ն. Ն. Լոդիգինա-Կոտսը շիմպանզեին մեծացրել է իր փոքրիկ դստեր
հետ ու թեպետև կապիկը կատարում էր մարդու աշխատանքին նման որոշ
գործողություններ, սակայն այդպես էլ չկարողացավ յուրացնել աշխատան-
քային պրոցեսի տրամաբանությունը. նա մուրճով մեխին հարվածում էր ան-
հարկի թույլ կամ ուժեղ, հաճախ մեխի կողքից:

Հասարակությունից դուրս մարդու կենսաբանական կառուցվածքները մը-
նում են միայն որպես մարդանալու հնարավորություններ: Հայտնի են դեպ-
քեր, երբ դժբախտ հանգամանքների բերումով նորածին երեխաները ըն-
կել են կենդանիների միջավայր և տարիների ընթացքում նույնիսկ ուղղահա-
յաց քայլել չեն սովորել, չեն տիրապետել հողաբաշխ խոսքին, արտահայտել
են միայն ձայներ, ինչպես այն կենդանիները, որոնց միջավայրում նրանք
մեծացել են: Այդ երեխաների մտածողությունը եղել է ծայրահեղ պարզունակ:

Պետք է նշել, որ մարդու զարգացման տարբեր էտապներում փոխվում է
կենսաբանականի և սոցիալականի փոխհարաբերության բնույթը, նրանց դերն
ու նշանակությունը: Մեր կարծիքով կենսաբանականի և սոցիալականի փոխ-
հարաբերությունը մարդու մոտ տարբեր բնույթ ունի նրա կյանքի հետևյալ
հիմնական շրջաններում. 1) ծնվելուց մինչև երկրորդ ազդանշանային համա-
կարգի ձևավորվելը. 2) դրանից մինչև սեռական հասունացման շրջանը. 3)
սեռական հասունության և լիարժեք աշխատանքային-հասարակական գոր-
ծունեության շրջանում. 4) ժերության շրջանում:

Մարդու մասին գիտությունների կարևոր խնդիրներից մեկը պետք է լինի սոցիալ-կենսաբանական օրինաչափությունների բնույթի բացահայտումը մարդու զարգացման այդ շորս բեկումնային շրջաններում:

Մարդու մեջ կենսաբանականի և սոցիալականի փոխհարաբերության ճիշտ բացահայտման համար մեթոդաբանական ուղեցույց է նաև մատերիալի շարժման ձևերի մասին Ֆ. Էնգելսի ուսմունքը: Խոսելով շարժման տարբեր ձևերի փոխադարձ կապերի մասին և, մասնավորապես, բնութագրելով կենսաբանության հարաբերությունը քիմիայի և ֆիզիկայի նկատմամբ, Ֆ. Էնգելսը նշում է կենսաբանության առանձնահատկությունը. «Ֆիզիոլոգիան, հասկանալի է, կենդանի մարմնի ֆիզիկան է, և առանձնապես քիմիան, սակայն դրա հետ միասին այն դադարում է հատկապես քիմիա լինելուց մի կողմից նրա գործողության ոլորտը սահմանափակվում է, բայց մյուս կողմից այն, դրա հետ միասին, այստեղ բարձրացնում է մի որոշ ավելի բարձր աստիճանի»¹: Վերլուծելով շարժման ձևերի փոխհարաբերության հարցը, այնուհետև Ֆ. Էնգելսը գրում է, որ որոշակի իմաստով ֆիզիկան մոլեկուլների մեխանիկա է, քիմիան ատոմների ֆիզիկա, իսկ կենսաբանությունը՝ սպիտակուցների քիմիա², դրանով շեշտելով ինչպես անմիջական կառուցվածքային և գենետիկական կապի առկայությունը շարժման մեխանիկական, ֆիզիկական, քիմիական և կենսաբանական ձևերի միջև, այնպես էլ շարժման կենսաբանական ձևի յուրահատկությունը ֆիզիկականի, մանավանդ քիմիականի համեմատությամբ: Կոպիտ մեթոդաբանական սխալ կլիներ շարունակել Էնգելսյան տրամաբանությունը և պնդել, թե սոցիոլոգիան էլ մարդկանց կենսաբանություն է: Դա կլինի անթույլատրելի էքստրապոլիացիա, որի մասին հաճախ զգուշացրել է Ֆ. Էնգելսը:

Բանն այն է, որ կենսաբանականի և սոցիալականի փոխհարաբերության բնույթը սկզբունքորեն տարբերվում է կենսաբանականի և քիմիականի փոխհարաբերությունից: Այդ տարբերությունը, ամենից առաջ, կայանում է նրանում, որ շարժման կենսաբանական և սոցիալական ձևերի միջև կառուցվածքային կապը բացակայում է, ի տարբերություն քիմիականի և ֆիզիկականի հարաբերակցության, որոնք կենսաբանականի մեջ միմյանց հետ կապված են անմիջականորեն, առարկայական-կառուցվածքային կապակցություններով: Կենսաբանականը անմիջականորեն չի մտնում սոցիալականի մեջ, ի տարբերություն, օրինակ, քիմիականի, որը կենսաբանականի մեջ մտնում է որպես նրա առարկայական բաղկացուցիչ տարր: Մարդու օրգանիզմում սոցիալական հատուկ սուբստրատ չկա: Մենք նշել ենք, որ սոցիալականը անհատի շրջանակներում վերաբերում է նրա գիտակցությանը, մտածողությանը և այլն, որոնք ունեն կենսաբանական (ֆիզիոլոգիական) հիմքեր, սակայն չեն հանգում նրանց, որ անհատից նրա օրգանիզմից դուրս սոցիալականը մարդկանց հասարակական (նյութական և հոգևոր) հարաբերությունների ամբողջությունն է, օբյեկտիվորեն, մարդուց դուրս գործող այն օրինաչափությունները, որոնք մարդկանց նյութական և հոգևոր գործունեության արդյունք են:

Հասարակական համակարգի տարբեր հանդիսացող մարդ-անհատի օրգանիզմում տեղի ունեցող պրոցեսները բոլոր մակարդակներում էլ ունեն կենսաբանական բնույթ: Բոլորովին այլ բան է, որ մարդու մոտ էվոլյուցիոն զար-

¹ Ֆ. Էնգելս, *Բնության դիալեկտիկա*, Նրևան, էջ 1969:

² Նույն տեղում, էջ 259:

դացման բերումով նրանք ձեռք են բերել սոցիալական որոշակի ֆունկցիաներ՝ գիտակցություն կրելու ունակություն, ինչին ընդունակ չեն ամենաբարձր զարգացած կենդանիները:

Դա ընդունում են շատ հետազոտողներ, այդ թվում և Գ. Ի. Ցարեգորոդցե-վը, որը սակայն, հակասում է ինքն իրեն, երբ գրում է. «պետք է նկատի ունենալ, որ կենսական պրոցեսների (ֆիզիոլոգիական և պաթոլոգիական) զարգացման տարբեր մակարդակներում սոցիալականի և կենսաբանականի փոխհարաբերությունը դրսևորվում է տարբեր կերպ: Ուսումնասիրության ընթացքում անցնելով ամբողջական օրգանիզմային մակարդակից համակարգայինին, համակարգայինից օրգանայինին, սրանից հյուսվածքայինին ու բջջայինին, վերջինս՝ ենթաբջջայինին ու կենսամոլեկուլյարին («վերից վար») նրկատվում է սոցիալականի և կենսաբանականի փոխհարաբերության փոփոխություն՝ սոցիալականի որոշակի «մարում», կենսաբանականի «աշխույժացում», ուժեղացում, և հակառակը»³:

Հասկանալի է, որ կարող է «մարել» միայն եղածը, մինչդեռ մարդու օրգանիզմում, նույնիսկ բարձրագույն ներվային գործունեության մակարդակում սոցիալական սուբստրատ չկա. կան միայն սոցիալական ֆունկցիա իրականացնող (գիտակցություն, խոսք, աշխատանք և այլն) կենսաբանական սուբստրատներ և դրանց կողմից իրագործվող ֆիզիոլոգիական օրինաչափություններ:

Կարևոր մեթոդաբանական նշանակություն ունի նաև այն էական տարբերության հաշվառումը, որ առկա է արտաքին միջավայրի հետ կենդանիների և մարդու փոխհարաբերության մեջ: Այդ տարբերությունը կայանում է նրանում, որ բույսերն ու կենդանիները շրջապատող միջավայրին հարմարվում են կենսաբանորեն՝ օգտագործում են այն, ինչ պատրաստի վիճակում ընձեռում է նրանց բնությունը: Հենց այդ հիմքի վրա էլ ընթանում է կենդանի համակարգերի էվոլյուցիան: Փոփոխված պայմաններում ապրելու և զարգանալու համար կենդանու և բույսի օրգանիզմը միայն մի հնարավորություն ունի՝ ենթարկվել կենսաբանական (ոչ միայն ֆենոտիպային, այլև գենոտիպային) մորֆոֆիզիոլոգիական վերափոխումների: Կենսաբանորեն շփոփոխվելու դեպքում կենդանու կամ բույսի օրգանիզմը կմահանա: Ինչպես բույսերը, այնպես էլ բոլոր կենդանիները շրջապատի փոփոխվող պայմաններին կարող են հարմարվել միայն իրենց կառուցվածքներն ու ֆունկցիաները փոփոխելով, մինչդեռ մարդը դրա կարիքը չի զգում: Միջավայրի պայմաններին մարդը հարմարվում է սոցիալականորեն. իր աշխատանքային գործունեությամբ վերափոխելով շրջապատը, հաճախ ստեղծելով յուր գոյության միջավայրը, նա հարմարեցնում է այն իր կենսաբանական և սոցիալական պահանջմունքներին, առանց էականորեն փոփոխելու յուր կենսաբանական կառուցվածքներն ու ֆունկցիաները:

Շրջապատող միջավայրին սոցիալականորեն հարմարվելու շնորհիվ հիմնականում ավարտվել է մարդու կենսաբանական էվոլյուցիան, նրա նկատմամբ դադարել է գործել բնական ընտրության օրենքը. մարդու զարգացման մեջ ավելի մեծ նշանակություն են ստացել սոցիալական գործոնները՝ ամենից

³ «Вопросы философии», II, 1970 г., стр. 83.

⁴ Г. И. Царегородцев. Проблема социального и биологического в медицине. М., 1965, стр. 46.

առաջ աշխատանքն ու նրա հետ կապված հարաբերությունները: Մարդաբանների մեծ մասի կարծիքով, մարդն այլևս չի ենթարկվում գենոտիպա-տեսակային փոփոխության: Իր գլխավոր և էական կողմերով մարդը միշտ մնում է Homo sapiens-ի շրջանակներում, շնայած տեսակի շրջանակներում կարող են տեղի ունենալ և ունենում են նշանակալից ֆենոտիպային փոփոխություններ (հասակի, կրծքավանդակի շրջանագծի, նորածինների միջին քաշի ու բոյի, ձևաբանական փոփոխություններ ներքին օրգաններում և այլն), ինչի մասին վկայում է մեր դարի հետաքրքիր երևույթներից մեկը՝ արսելերացիայի պրոցեսը: Դրա պատճառն այն է, որ մարդու իսկ կողմից ստեղծվող գոյության արհեստական պայմանները ավելի ու ավելի մեծ չափով են նրան պարսպում բնական ու սոցիալական միջավայրի անբարենպաստ գործոնների ներգործությունից: Ավելի ու ավելի խորը ճանաչելով բնության ու սեփական զարգացման օրինաչափությունները, մարդը գիտակցորեն ձգտում է պահպանել իրեն որպես տեսակի, հարմարեցնելով պայմանները իր սոցիալական պահանջմունքներին և օրգանիզմի կենսաբանական հնարավորություններին:

Սակայն մարդուն ոչ միշտ է հաջողվում իր մեջ ներդաշնակել կենսաբանական և սոցիալական զարգացումը, նրա կողմից ստեղծված գոյության արհեստական պայմանները ոչ միշտ են անհիվանդագին, ուստի սոցիալական գործոնները և անցյալում և, մանավանդ, ներկայումս, նշանակալից տեղ են զբաղում մարդու ախտաբանության ժամանակակից վիճակում, պատճառ դառնալով սիրտանոթային, ուռուցքային, նյարդա-հոգեկան և մի շարք այլ հիվանդությունների շատացման: Դեռևս Դ. էնգելսը գրում էր. «Հրապուրվենք, սակայն, բնության նկատմամբ մեր հաղթանակներով: Ամեն մի հաղթանակի համար նա մեզնից վրեժխնդիր է լինում: Այդ հաղթանակներից յուրաքանչյուրը, միշտ է, առաջին հերթին տալիս է այն, ինչ մենք նկատի ունենք, սակայն երկրորդ և երրորդ հերթին լինում են և միանգամայն այլ, շնախատեսված հետևանքներ, որոնք շատ հաճախ ոչնչացնում են առաջինների նշանակությունը»⁵:

Արտասահմանյան որոշ հեղինակներ (է. Գյուան, Ա. Դյուսսեր, Ռ. Դյուրոն և այլոք) այսպես կոչված սոցիալական դեզադապտացման իրենց տեսության մեջ մեր դարում որոշ հիվանդությունների շատացման պատճառը համարում են օրավուր խորացող հակասությունը մարդու կենսաբանական հնարավորությունների և նրա սոցիալական պայմանների զարգացման հարաճուն տեմպի միջև: Նրանց կարծիքով, մարդու կենսաբանական հնարավորությունները, հաղարամյակներում ձևավորված կենսական ֆունկցիաները համեմատաբար կայուն և պահպանողական են, մինչդեռ սոցիալական զարգացման տեմպերը գնալով ավելի ու ավելի են մեծանում, դառնում անհամապատասխան մարդու կենսաբանական հնարավորություններին: Քաղաքականության զարգացումը, այդ հեղինակների կարծիքով, ստեղծում է աններդաշնակություն մարդու կենսաբանական և սոցիալական զարգացման ուժերի միջև, որը և այսպես կոչված քաղաքակրթական հիվանդությունների պատճառ է:

Սոցիալական դեզադապտացման այս տեսությունը, սակայն, իր մեջ ունենալով որոշ ռացիոնալ հատիկ, մեթոդաբանական տեսակետից սնանկ է, հիմնված մարդու մեջ սոցիալականի և կենսաբանականի հարաբերակցության

⁵ Դ. էնգելս, Բնության դիալեկտիկա, Երևան, էջ 178, 1969.

սխալ ըմբռնման՝ կենսաբանականի դերի չափազանցման և մարդու սոցիալական էության անտեսման վրա: Մենք արդեն նշել ենք, որ ի տարբերություն բոլոր կենդանիների, շրջապատող միջավայրին մարդը հարմարվում է ոչ թե կենսաբանորեն, այլ սոցիալականորեն, այսինքն, միջավայրի փոփոխվող պայմաններին մարդը հարմարվում է փոփոխելով ոչ թե իր կենսաբանական կազմակերպությունն ու ֆունկցիաները, այլ՝ աշխատանքային գործունեությամբ վերափոխելով այդ պայմանները և դրանք համապատասխանեցնելով իր կենսաբանական հնարավորություններին: Մարդու և կենդանիների այս սկզբունքային տարբերությունն է, ահա, որ չեն հասկանում սոցիալական դեզադապտացման տեսության կողմնակիցները: Այնուհետև, խոսելով «քաղաքակրթության հիվանդությունների» մասին, սոցիալական դեզադապտացման տեսության հեղինակները «քաղաքակրթություն» վերացական հասկացության օգտագործմամբ փորձում են վերացնել քաղաքակրթության դասակարգային բովանդակությունը, անտեսել ժամանակակից աշխարհում երկու՝ սոցիալիստական և բուրժուական քաղաքակրթությունների առկայությունը, որոնցում սկզբունքորեն տարբեր սոցիալական և առողջապահական հետևանքներ է առաջացնում արդի գիտա-տեխնիկական հեղափոխությունը: Խորը քննության առնելով սոցիալական դեզադապտացման տեսությունը, պարզվում է, որ այն, ըստ էության, միասնական ինդուստրիալ հասարակության հակամարքսիստական տեսության տարբերակներից մեկն է:

Այսպիսով, մարդու մեջ կենսաբանականի և սոցիալականի փոխհարաբերության պրոբլեմը պատկանում է մարդու մասին գիտությունների կարևորագույն պրոբլեմների թվին և գիտա-տեխնիկական հեղափոխության մեր դարում հանդես գալով մեթոդաբանական յուրակերպ դոմինանտի դերում, կանխորոշում է ոչ միայն ընդհանուր մոտեցումը մարդու մասին ուսմունքի ընդհանուր պրոբլեմները լուծելիս, այլև սոցիալական, հոգեբանական, բժշկական և անտրոպոլոգիական առավել կոնկրետ հարցերը մեկնաբանելիս:

Հայկական սովետական

Հանրագիտարան

Ստացված է 7. V. 1971 թ.